

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 8/3

13 մայիսի 2016 թ.

Քննարկվեց «Շրջակա միջավայրի վրա ազդեցության փորձաքննական կենտրոն» ՊՈԱԿ-ի ներկայացուցչի գանգատը ՀՀ ՖՆ իրավաբանական վարչության պետի 10.03.2016թ-ի թիվ 315786/02 որոշման դեմ:

«Շրջակա միջավայրի վրա ազդեցության փորձաքննական կենտրոն» ՊՈԱԿ-ի ներկայացուցչի ներկայացուցչի գանգատում բերված փաստարկները.

25.02.2016թ-ին ուղարկվել է ծանուցագիր, որով «Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրենին 10.03.2016թ-ին ժամը 11:00-ին հրավիրում են ՀՀ ՖՆ իրավաբանական վարչության թիվ 2-րդ բաժին՝ որպես վարչական պատասխանատվության ենթարկվող անձի: Համաձայն 24.02.2016թ. թիվ 637/02 որոշման՝ իրավաբանական վարչության պետի կողմից վարչական վարույթի նյութերի քննարկման արդյունքում որոշվել է «Շրջակա միջավայրի վրա ազդեցության փորձաքննական կենտրոն» ՊՈԱԿ-ից գանձել 2015թ. դեկտեմբեր և 2016թ. հունվար ամիսների պետ բյուջեի նկատմամբ ֆինանսական պարտավորությունների գումարը: 10.03.2016թ-ին ՀՀ ՖՆ իրավաբանական վարչության պետը պարզել է, որ «Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրենը սահմանված ժամկետում չի վճարել հարկերը և 23.02.2016թ. դրությամբ առաջացրել է ՀՀ պետ. բյուջեի նկատմամբ պարտք: Համաձայն թիվ 315786/02 որոշման և ՀՀ ՎԻՎ օրենսգրքի 170.3 հոդվածի՝ «Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրենին որոշվել է ենթարկել վարչական պատասխանատվության և տուգանել 20.000 դրամի չափով:

Տեղեկացվում է, որ «Շրջակա միջավայրի վրա ազդեցության փորձաքննական կենտրոն» ՊՈԱԿ-ի կողմից 22.02.2016թ-ին Կենտրոն ՏՀՏ-ի 900005600136 հ/հ-ին սահմանված չափով կատարվել է միջբանկային փոխանցում՝ եկամտային հարկի հունվար ամսվա համար, կատարելով «Շրջակա միջավայրի վրա ազդեցության փորձաքննական կենտրոն» ՊՈԱԿ-ի ֆինանսական պարտավորությունները ՀՀ պետական բյուջեի նկատմամբ:

Ելնելով վերոգրյալից՝ գանգատաբերը խնդրում է չեղյալ համարել ՀՀ ՖՆ իրավաբանական վարչության պետի 10.03.2016թ-ի թիվ 315786/02 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով «Շրջակա միջավայրի վրա ազդեցության փորձաքննական կենտրոն» ՊՈԱԿ-ի վարչական վարույթի նյութերը պարզել է, որ 23.02.2016թ-ի դրությամբ կազմակերպության չկատարված հարկային պարտավորությունները կազմում են 659.282 դրամ: Մասնավորապես, եկամտային հարկի գծով պարտավորությունը կազմում է 659.282 դրամ, որն առաջացել է 2015թ-ի դեկտեմբեր և 2016թ-ի հունվար ամիսների հաշվարկներից: Արդյունքում ՀՀ ՖՆ իրավաբանական վարչության պետի կողմից 24.02.2016թ-ին կայացվել է թիվ 637/02 որոշումը՝ կազմակերպությունից 659.282 դրամ պարտավորության գումար գանձելու մասին:

Ելնելով վերոգրյալից՝ ՀՀ ՖՆ իրավաբանական վարչության պետը, քննելով 10.03.2016թ-ի վարչական իրավախախտման վերաբերյալ արձանագրությունը և կից նյութերը պարզել է, որ «Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրեն Հենրիկ Գրիգորյանը սահմանված ժամկետում չի վճարել հարկերը և 23.02.2016թ-ի դրությամբ առաջացրել է պարտք ՀՀ պետական բյուջեի նկատմամբ 659.282 դրամի չափով: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 170.3-րդ հոդվածով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ՖՆ իրավաբանական վարչության պետի կողմից 10.03.2016թ-ին ընդունվել է վարչական իրավախախտման գործի վերաբերյալ թիվ 315786/02 որոշումը (այսուհետ նաև Որոշում) Հենրիկ Գրիգորյանի նկատմամբ վարչական տույժ նշանակելու մասին՝ գումարով 20.000 դրամի չափով:

Վերոգրյալի կապակցությամբ հարկ է նշել, որ «Վարչական իրավախախտումների վերաբերյալ» ՀՀ օրենսգրքի (այսուհետ՝ Օրենսգիրք) 8-րդ հոդվածի համաձայն. «Վարչական իրավախախտում կատարած անձը ենթակա է պատասխանատվության իրավախախտումը կատարելու ժամանակ և վայրում գործող օրենսդրության հիման վրա»:

Օրենսգրքի 22-րդ հոդվածի համաձայն. «Վարչական տույժը համարվում է պատասխանատվության միջոց և կիրառվում է, նպատակ ունենալով վարչական իրավախախտում կատարած անձին դաստիարակել խորհրդային օրենքները պահպանելու, սոցիալիստական համակեցության կանոնները հարգելու ոգով, ինչպես նաև կանխել ինչպես իր իսկ՝ իրավախախտողի, այնպես էլ ուրիշ անձանց կողմից նոր իրավախախտումների կատարումը»:

Օրենսգրքի 32-րդ հոդվածի 2-րդ պարբերության համաձայն. «Տույժ նշանակելիս հաշվի են առնվում կատարված իրավախախտման բնույթը, խախտողի անձը, նրա մեղքի աստիճանը, գույքային դրությունը, պատասխանատվությունը մեղմացնող և ծանրացնող հանգամանքները»:

Օրենսգրքի 279-րդ հոդվածի համաձայն. «Վարչական իրավախախտման վերաբերյալ գործը քննելիս մարմինը (պաշտոնատար անձը) պարտավոր է պարզել՝ կատարվել է, արդյոք, վարչական իրավախախտում. արդյոք, տվյալ անձը մեղավոր է այն կատարելու մեջ. արդյոք, նա ենթակա է վարչական պատասխանատվության»:

Վերը նշված հոդվածների դրույթներից հետևում է, որ վարչական տույժը կարող է նշանակվել այն անձի նկատմամբ, որը թույլ է տվել խախտումը:

Քննարկման ընթացքում պարզվեց, որ 05.02.2015թ-ից «Շրջակա միջավայրի վրա ազդեցության փորձաքննական կենտրոն» ՊՈԱԿ-ի տնօրեն է հանդիսանում ոչ թե վարչական պատասխանատվության ենթարկված անձ Հենրիկ Գրիգորյանը, այլ՝ Վարդան Սահակյանը: Այսինքն, վարչական տույժը նշանակվել է այն անձի նկատմամբ, որի կողմից Որոշման մեջ նշված խախտումը թույլ չի տրվել: Հետևապես, ղեկավարվելով «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի բ) կետի դրույթներով Հանձնաժողովը գտնում է, որ գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

Բեկանել ՀՀ ՖՆ իրավաբանական վարչության պետի 10.03.2016թ-ի թիվ 315786/02 որոշումը, իսկ գործը՝ կարճել:

Հանձնաժողովի նախագահ՝



Վ.ՄԻՐՈՒՄՅԱՆ